

Nelayan digalak mencarum SKSPS


Melibatkan seramai 42,000 nelayan yang berdaftar di seluruh Malaysia

Oleh NOORAINON MOHAMED YUSOF

BUKIT GANTANG

Seramai 42,000 nelayan yang berdaftar di seluruh Malaysia digalakkan supaya mencarum dalam Skim Keselamatan Sosial Pekerjaan Sendiri (SKSPS) di bawah Pertubuhan Keselamatan Sosial (Perkeso).

Menteri Pertanian dan Industri Makanan, Datuk Seri Dr Ronald Kiandee berkata, langkah terbaharu itu adalah untuk menggantikan Caruman Insurans Nelayan Berkelompok Lembaga Kemajuan Ikan Malaysia (LKIM) bermula pada 15 Ogos ini.



Ronald (kiri) melawat reraui Persatuan Nelayan Negeri pada Mini Karnival Industri Makanan dan Pelancaran Caruman Perkeso Nelayan di Dewan Bunga Raya dekat Changkat Jering, Bukit Gantang semalam.

"Pertama kali pekerja sendiri dalam sektor perikanan boleh mencarum mengikut Akta Keselamatan Sosial Pekerjaan Sendiri 2017. Nelayan yang mencarum dapat memberi perlindungan dan kebaikan kepada mereka serta ke-

luarga masing-masing.

"Sebelum ini nelayan tiada caruman dan ia adalah langkah proaktif Perkeso untuk nelayan mendapatkan perlindungan sama seperti yang dinikmati sektor lain."

"Skim ini terbuka kepada

semua nelayan, namun mereka yang tidak menerima elauan tersebut boleh mencarum sendiri skim ini," katanya kepada pemberita selepas melancarkan Mini Karnival Industri Makanan dan Pelancaran Caruman Perkeso Nelayan di De-

wan Bunga Raya dekat Changkat Jering di sini semalam.

Hadir sama, Pengurus LKIM, Datuk Syed Abu Husin Hafiz Syed Abdul Fasal dan Ketua Eksekutif Perkeso, Datuk Seri Dr Mohammed Azman Aziz Mohammed.

Ronald berkata, cadangan caruman adalah sebanyak RM157.20 setahun bagi nelayan yang layak menerima Elauan Sara Hidup Nelayan..

"Pemotongan caruman ini akan dilaksanakan secara terus melalui Sistem Insentif Nelayan (FIP) secara berperingkat dan ia bermula pada 15 Ogos ini melibatkan seramai 3,879 nelayan.

"Saya yakin LKIM sentiasa mengambil langkah proaktif dan positif bagi menjaga kebaikan serta kesejahteraan nelayan.

"Pemilik bot kategori zon tangkapan B, C dan C2 juga perlu memberi kerjasama dengan mendaftar dan mencarum sendiri skim ini dengan Perkeso," kata beliau.

SKSPS beri perlindungan keseluruhan

BUKIT GANTANG - Nelayan yang mencarum di bawah Skim Keselamatan Sosial Pekerjaan Sendiri (SKSPS) bakal menikmati faedah tunai selain rawatan perubatan, pemulihan jasmani dan latihan vokasional.

Ketua Eksekutif Perkeso, Datuk Seri Dr Mohammed Azman Aziz Mohammed berkata, SKSPS memberi perlindungan kepada individu yang menjalankan pekerjaan sendiri seperti bencana pekerjaan termasuk penyakit pekerjaan dan kemalangan semasa menjalankan aktiviti pekerjaan.

"Sebagai permulaan, Lembaga Kemajuan Ikan Ma-

laysia (LKIM) akan membuat caruman SKSPS kepada seramai 3,879 nelayan dengan bayaran caruman setahun sebanyak RM157.20 mengikut pilihan pelan 1 SKSPS.

"Di bawah skim ini, orang tanggungan atau waris layak mendapat Faedah Orang Tanggungan jika pencarum meninggal dunia akibat bencana kerja.

"Pinjaman pendidikan juga disediakan kepada anak-anak pencarum sekiranya pencarum meninggal dunia atau semasa menerima Faedah Hilang Upaya Kekal berkala," katanya.

Terdahulu, Dr Mohammed Azman menandatangani

Memorandum Persefahaman (MoU) bersama Ketua Pengarah LKIM, Othman Abdul Latiff yang disaksikan Menteri Pertanian dan Industri Makanan, Datuk Seri Dr Ronald Kiandee.

Majlis berlangsung pada Karnival Mini Industri Makanan dan Pelancaran Caruman Perkeso Nelayan di Dewan Bunga Raya, Changkat Jering di sini semalam.

Dr Mohammed Azman berkata, menerusi kerjasama itu diharap perlindungan SKSPS dapat diperluaskan kepada sektor-sektor lain di bawah Kementerian Pertanian dan Industri Makanan seperti pertanian serta penternakan.

Nelayan sambut baik SKSPS

BUKIT GANTANG

- Persatuan Nelayan Perak menyambut baik inisiatif Perkeso menyediakan perlindungan Skim Keselamatan Sosial Pekerjaan Sendiri (SKSPS) yang memberi manfaat kepada lebih 15,000 nelayan di Perak.

Pengerusinya, Mansor Yusof berkata, SKSPS dapat memberi perlindungan keseluruhan kepada ahli berbanding insurans kelompok sebelumnya.

"Kita memang mengharapkan Perkeso buka satu skim yang memberi perlindungan kepada nelayan.

"Selepas mendengar penjelasan yang disampaikan Perkeso, ia memberi banyak faedah kepada kami dari segi kebaikan," katanya kepada *Sinar Harian* pada Mini Karnival Industri Makanan dan Pelancaran Caruman Perkeso Nelayan di Dewan Bunga Raya, Changkat Jering di sini semalam.

Menurutnya, pihaknya menggalakkan ahli-ahli Persatuan Nelayan Kawasan (PNK) Kerian,



MANSOR

RAMLI

Matang, Sungai Tinggi, Manjung Utara, Manjung Selatan, Pangkor dan Hilir Perak dapat mencarum skim tersebut.

Sementara itu, nelayan, Ramli Saleh, 53, berkata, tugas mereka terdedah kepada pelbagai risiko ketika di perairan.

"Sebelum ini kami tidak mengetahui sangat skim-skim yang diperkenalkan Perkeso tetapi apabila mendengar penjelasan skim SKSPS, banyak manfaatnya.

"Ia dipotong menerusi elauan yang kami terima, jadi sangat eloklah dan tidak mahal. Potong lebih pun tak apa kerana skim ini terlalu banyak kebaikannya untuk kami," kata Ramli.



Dr Mohammed Azman (kanan) bertukar MoU yang ditandatangani dengan Othman sambil disaksikan Ronald (tengah) di Dewan Bunga Raya dekat Changkat Jering semalam.